

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-30-Z/23

Kakanj, 26.06.2023. godine

Z A P I S N I K

**sa 30. redovne sjednice Općinskog vijeća održane 26.06.2023. godine (ponedjeljak)
u sali Općinskog vijeća sa početkom u 9:00 sati
(sažetak zapisnika)**

Predsjedavajući Općinskog vijeća Slaven Katičić je pozdravio prisutne i otvorio 30. redovnu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Izudin Puščul, Omer Musić, Nerma Aliefendić, Safet Šahman, Mejrema Purišević, Mediha Mamela, Elvir Delibašić, Namir Talić, Adis Mrkonjić, Amar Selimović, Džemal Bećirhodžić i Izudin Hrusto (**SDA**)

Ahmed Begić, Miroslav Spasojević i Edin Šljivo (**SDP BiH**)

Mirsad Tursum, Zerina Kovač, Fakir Ajdinović i Sabit Čehajić (**S BiH**)

Dževdet Huskić, Marcela Ravlija i Branko Češljčić (**naknadno pristupio**) (**NS**)

Mugdin Gorak i Enver Merdić (**naknadno pristupio**) (**SBB BiH**)

Adnan Čobo i Armin Bašić (**DF**)

Slaven Katičić (**HDZ BiH**)

Mujo Fafulić (**nacionalna manjina**)

Odsutni vijećnici: Aldin Šljivo (**SDA**) i Vinka Aletović (**SDP BiH**)

Predsjedavajući je konstatovao da je na sjednici u momentu prijave prisutno 26 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Mirnes Bajtarević, općinski načelnik

Ferdo Mijač, sekretar Općinskog vijeća

Džihad Berbić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Bahrudin Arnaut, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

Edin Aliefendić, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Nurudin Hrusto, pomoćnik općinskog načelnika za civilnu zaštitu

Mukades Delibašić, pomoćnik općinskog načelnika za imovinskopravne, geodetske poslove i katastar nekretnina

Zijad Neimarlija, direktor Zavoda za planiranje i izgradnju općine Kakanj

Mahir Sikira, šef Stručne službe za poslove Općinskog načelnika

Izviestioci, obrađivači, gosti

Muamer Čelebić, direktor JP „Grijanje“ d.o.o. Kakanj
Fahrudin Buza, predsjednik UO JU „Dom zdravlja sa stacionarom“ Kakanj
Ibrahim Aličković, šef HES-a

Predstavnici medija

NTV IC Kakanj

Radio Kakanj

Napomene o radu Kolegija Općinskog vijeća

U pripremi 30. redovne sjednice Općinskoga vijeća, Kolegij Općinskog vijeća je 19.06.2023. godine, održao sjednicu na kojoj je razmatrao:

a) **Odluku o odabiru partnerske jedinice lokalne samouprave za projekt *Prodrška tranziciji regiona bogatih ugljem – BiH Su Tra.***

Odluka je primljena k znanju.

b) **Davanje saglasnosti na Odluku o kalkulaciji troškova transporta komunalnog otpada iz udaljenih mjesnih zajednica.**

Kolegij je Odluku proslijedio općinskom načelniku i Službi za privredu, urbanizam i zaštitu okoline na mišljenje.

Usvajanje zapisnika sa 29. redovne sjednice Općinskog vijeća

Nije bilo diskusije o zapisniku i isti je usvojen jednoglasno sa 25 glasova ZA.

Komentari na dostavljene odgovore na vijećnička pitanja

Safet Šahman: je komentarisao odgovor na postavljeno pitanje u vezi utroška sredstava i realizacije projekta sanacije dionice puta Stari dom – Podborje za koji su sredstva izdvojena u Budžetu za 2021. godinu. U odgovoru stoji da projekat nije realizovan iz razloga što izvođač sa kojim je potpisan ugovor zahtjeva veći iznos sredstava za realizaciju projekta, te se ne zna kada će projekat biti realizovan. Uz to je rekao da je lično razgovarao sa izvođačem koji je iskazao nezainteresovanost za posao, pa je tražio da se potpisani ugovor raskine i pokrene nova tenderska procedura za izbor ponuđača, jer smatra da se prema trenutnom stanju projekat nikada neće realizovati.

Armin Bašić: je podsjetio da nije dobio odgovor od Općinskog pravobranilaštva na postavljeno vijećničko pitanje prije tri sjednice, a u vezi gradske zelene pijece.

Komentari na dostavljena mišljenja na vijećničke inicijative

Nije bilo komentara na dostavljena mišljenja na vijećničke inicijative.

Vijećnička pitanja

Marcela Ravlija: je postavila dva vijećnička pitanja. Prvo je hoće li Općina Kakanj zaštititi stanovnike naselja koji su ugroženi aerozagađenjem tj. prašinom? S tim u vezi istakla je prigovore stanovnika Dumanca, Donjeg Kaknja i Mramora na prašinu koja dolazi s površinskog kopa, te pitala šta su općinske službe i firme odgovorne za zagađenje uradile ili planiraju uraditi da bi se ovaj problem riješio. Drugo pitanje ko naručuje i izrađuje elaborate za postavljanje signalizacije i usporivača brzine? Pitanje je postavila u vezi s odgovorom Zavoda za planiranje i izgradnju na podnesenu inicijativu, da je neophodno izraditi elaborat za postavljanje usporivača brzine u blizini srednjih škola i JU „KSC“ Kakanj.

Dževdet Huskić: je postavio dva vijećnička pitanja. Prvo pitanje je kada će JP „Vodokom“ postupiti po nalogu Zavoda za planiranje i izgradnju Općine Kakanj i podrezati stabla iza zgrade u kojoj se nalazi ASA Banka, a imajući u vidu da su dva stanara predmetne zgrade alergični na polen stabla breze, zbog

čega imaju izražene zdravstvene probleme. Napomenuo je da je nalog od strane Zavoda izdat na vrijeme, na osnovu zahtjeva predsjednika kućnog savjeta od 16.03.2023. godine, te da se čeka da JP „Vodokom“ odradi svoj dio posla. Također, pitao je da li Zavod za planiranje i izgradnju prati i kontroliše realizaciju izdatih naloga ili je njihov dio posla završen nakon izdavanja naloga? Drugo pitanje je mogu li načelnik i nadležne službe poduzeti korake i u saradnji sa Kantonalnom direkcijom za ceste zaštititi regionalnu cestu R-445 od kamionskog transporta uglja za TE „Kakanj“? Istakao je da pored konstantne buke koju stvaraju teški kamioni pri prolasku kroz ulicu 311 lahke brigade i kroz naselje Doboje prema TE „Kakanj“, u ljetnim mjesecima kad se asfalt razgrije, težina vozila i tereta je pogubna za asfalt, te predlaže aktivnosti u tom pravcu.

Armin Bašić: je postavio vijećničko pitanje kada se planira gradnja poligona za obuku vozača obzirom da su sredstva planirana u Budžetu? Napomenuo je da je Ministarstvo obrazovanja uputilo obavijest da će u narednom periodu angažovati komisiju koja će utvrditi ispunjenost uslova, te ukoliko se utvrdi da isti nisu ispunjeni, općini Kakanj će se oduzeti status ispitnog mjesta, a prema trenutnom stanju općina Kakanj ne ispunjava zakonom propisane uslove za ispitno mjesto iz oblasti praktičnog dijela ispita za vozače.

Predsjedavajući je konstatovao da su vijećnici: Sabit Čehajić, Adis Mrkonjić, Branko Češljčić i Enver Merdić postavili vijećničko pitanje bez korištenja govornice.

Sabit Čehajić: je postavio vijećničko pitanje zašto se kasni sa izdavanjem rješenja za dječiji dodatak, koliko je riješeno (realizovano) zahtjeva sa 31.05.2023. godine, a vezano je za najavu Federalnog ministarstva, da će pomoć porodicama korisnika dječijeg dodatka kojima je zaključeno rješenje sa 31.05.2023. godine, biti isplaćena i da li to znači, ako podnosiocima nije zahtjev riješen do tog datuma, da neće imati pomoć?

Adis Mrkonjić: je postavio vijećničko pitanje da li postoji odgovarajuće rješenje za proširenje puta na izlazu iz Zgošće prema Tršću (prije mosta na rijeci Zgošći)? Na navedenoj lokaciji skoro je nemoguće mimoilaženje dva vozila i predstavlja potencijalno veoma opasnu dionicu za sve učesnike u saobraćaju.

Branko Češljčić: je postavio vijećničko pitanje zašto se i dalje kamionski prevoz uglja na relaciji Haljinići – Separacije vrši pretovarenim i otkrivenim kamionima?

Enver Merdić: je postavio vijećničko pitanje zašto se ne poveća angažman na odvozu smeća tokom vikenda, obzirom da je stanje u cijelom gradu po tom pitanju veoma loše?

Vijećničke inicijative

Marcela Ravlija: je pokrenula dvije vijećničke inicijative. Prva se odnosi na besplatnu podršku i pomoć patronažnih sestara porodiljama. Patronažna posjeta bi trebala obuhvaćati pregled majke, pregled novorođenčeta, pomoć pri dojenju i brigu o psihičkom stanju porodilje. Smatra da dobro educirana patronažna sestra može majci i bebi biti od presudne pomoći u osjetljivom postporođajnom periodu, pogotovo ako na vrijeme prepozna sva patološka stanja. Druga inicijativa je za zamjenu kanti za otpatke u užem gradskom području. Česta slika u ranim jutarnjim satima u užem gradskom području je razbacano smeće po trotoarima i ulicama. Zbog toga predlaže zamjenu postojećih kanti adekvatnijim, u koje se neće moći bacati smeće iz poslovnih objekata i stanova i iz kojih životinje neće moći izvlačiti smeće.

Izudin Hrusto: je pokrenuo vijećničku inicijativu da Notarska komora izda preporuku kakanjskim notarima da prilikom zaključenja ugovora o prometu nekretnina (kuća, stanova i poslovnih prostora) upozoravaju stranke na moguće postojanje neizmirenih obaveza po osnovu komunalnih usluga, te da iz tog razloga od prodavaca traže da prilože odgovarajuće potvrde od javnih preduzeća kojima se potvrđuje da nemaju zaostalih obaveza po osnovu neplaćenih računa za komunalne usluge. Napomenuo je da je navedeno odavno praksa u Kantonu Sarajevo.

Dževdet Huskić: je pokrenuo dvije vijećničke inicijative. Prva inicijativa je da se uredi i zaštiti šuma bijelog bora iznad sela Drijen. Samo zahvaljujući brizi mještana šuma je još uvijek sačuvana od devastacije. Inicijativom traži da se pomenuti lokalitet uredi i zaštiti, da se zabrani ulazak vozilima u

područje šuma, uredi logorišta i ložišta za vatru, postave klupe i izgradi igralište za djecu na ulazu u šumu. Sve navedeno bi primamilo veći broj građana općine i od ovog mjesta napravilo poželjno mjesto za dnevni ili popodnevni odmor. Druga je da se oslika i uredi potporni zid nove ulice iza Pošte i iznad dječijeg igrališta. Smatra da je trenutno stanje potpornog zida depresivno i estetski neuređeno, pa predlaže da se raspiše javni poziv za oslikavanje tog zida, na koji način bi zid bio simbolično ukrašen, te bi popravio betonski ambijent koji dominira igralištem.

Predsjedavajući je konstatovao da su vijećnici: Safet Šahman, Adis Mrkonjić, Adnan Čobo, Branko Češljic i Amar Selimović podnijeli vijećničke inicijative bez korištenja govornice.

Safet Šahman: je pokrenuo dvije vijećničke inicijative. Prva inicijativa je da se izvrši sanacija i čišćenje puta od korova na relaciji Kamenolom Trgošped – Podborje. Cijelom dužinom puta potrebno je sasjeći izraslo granje radi bolje preglednosti u saobraćaju. Druga je da se izvrši popravka i zamjena pokvarenih ili neispravnih rasvjetnih tijela u naseljenim mjestima Varalići, Krševac i Hodžići, iz razloga što već duži vremenski period rasvjetna tijela nisu u funkciji.

Adis Mrkonjić: je pokrenuo vijećničku inicijativu za legalizaciju alternativnog puta Tršće – Gornji Banjevac. Razlog za istu su učestali odroni i pojave klizišta na putnoj komunikaciji Kakanj – Tršće, zbog čega je navedeni alternativni put sve više u upotrebi kao obilaznica, a uslovi na istom su jako loši.

Adnan Čobo: je pokrenuo dvije vijećničke inicijative. Prva inicijativa je da se u sklopu manifestacije „Kakanjski dani“ ili u toku ljeta angažira Omladinski hor Zenica sa profesorom Karovićem i da izvedu mjuzikl „Quo vadis, homo“. Napomenuo je da je spreman učestvovati u organizaciji predmetnog događaja na bilo koji način, uključujući i finansijski. Druga inicijativa je da se svim porodicama na području općine Kakanj koje prilože dokaz da u porodici niko nije zaposlen dodijeli jednokratna novčana pomoć u iznosu od 1.000,00 KM. Smatra da je apsurd da zaposleni, uključujući i javnu upravu dobiju finansijska sredstva kao pomoć u turbulentnom vremenu, a da ova mjera zaobiđe najugroženije kategorije, a posebno porodice u kojima niko nije zaposlen.

Branko Češljic: je pokrenuo vijećničku inicijativu da se uredi i osvijetli željeznička stanica u Čatićima koju koriste putnici iz doline Trstionice.

Amar Selimović: je pokrenuo vijećničku inicijativu za izgradnju trotoara na regionalnoj cesti R-445 i to na mjestu gdje mještani naselja Rošćevina izlaze iz podvožnjaka i kreću se prema školi u Donjem Kaknju. Također je potrebno uraditi i pješački prelaz na odgovarajućem dijelu ceste. Inicijativu podnosi zbog činjenice da je na prostoru naselja Rošćevina evidentno povećano naseljavanje stanovništva, pa bi se ovim projektom značajno olakšao život mještana, a posebno djece koja se trenutno do škole kreću regionalnom cestom, što može dovesti do neželjenih posljedica.

Utvrđivanje dnevnog reda

Predsjedavajući je za 30. redovnu sjednicu predložio dnevni red koji je usaglašen na sjednici Kolegija, a kako nije bilo primjedbi na predloženi dnevni red isti je jednoglasno usvojen sa 28 glasova ZA.

Usvojeni dnevni red

1. Prijedlog odluke o načinu i uslovima raspolaganja nekretninama – poslovnim prostorima u vlasništvu Općine Kakanj
2. Prijedlog rješenja o imenovanju Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj
3. Prijedlog odluke o utvrđivanju kriterija, postupka, načina davanja i izmjene naziva ulica, trgova, parkova, mostova, institucija, ustanova i naseljenih mjesta na području općine Kakanj
4. Razmatranje Izvještaja o radu JU „Dom zdravlja sa stacionarom“ Kakanj za period 1.1-31.12. 2022. godine
5. Razmatranje Plana rada i razvoja JU „Dom zdravlja sa stacionarom“ Kakanj za 2023.godinu
6. Razmatranje Informacije o zdravstvenom stanju stanovništva općine Kakanj i informacije o epidemijama u 2022. godini

7. Razmatranje Izvještaja o radu JU Centar za socijalni rad sa Finansijskim izvještajem za 2022. godinu
8. Razmatranje Izvještaja o poslovanju JP „Grijanje“ d.o.o. Kakanj sa Finansijskim izvještajem i Izvještajem o reviziji finansijskih izvještaja za 2022. godinu

1. Prijedlog odluke o načinu i uslovima raspolaganja nekretninama – poslovnim prostorima u vlasništvu Općine Kakanj

Predlagač: općinski načelnik

Obrađivač: Služba za imovinskopravne, geodetske poslove i katastar nekretnina

Izjestilac: Mukades Delibašić, pomoćnik općinskog načelnika

Mukades Delibašić: je predložio ispravku tehničke greške u predloženoj odluci i to: za poslovni prostor pod R/b 1. ispravka površine gdje stoji 38,36 m², a treba da stoji 38,00 m², te pod R/b 3. ispravka lokacije poslovnog prostora gdje stoji Alije Izetbegovića L-C, a treba da stoji Alije Izetbegovića L-1, kao i ispravku broja k.č. kod istog poslovnog prostora gdje stoji 1363/106, a treba da stoji 1363/105.

U diskusiji nije niko učestvovao i Vijeće je jednoglasno sa 28 glasova ZA usvojilo Odluku o načinu i uslovima raspolaganja nekretninama – poslovnim prostorima u vlasništvu Općine Kakanj.

2. Prijedlog rješenja o imenovanju Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj

Predlagač: Komisija za izbor i imenovanje

Obrađivač: Služba za imovinskopravne, geodetske poslove i katastar nekretnina

Izjestilac: Mediha Mamela, predsjednica Komisije

Mediha Mamela: je u ime Komisije za izbor i imenovanje predložila pauzu radi konsultacija.

Predsjedavajući je dao pauzu od 10 minuta.

Mediha Mamela: je nakon pauze pročitala prijedlog članova Komisije za provođenje javnog nadmetanja koji je usaglašen sa predsjednicima klubova vijećnika i to: Adi Kubat – predsjednik, Velida Murtić – zamjenica predsjednika i članovi: Slaven Katičić, Almir Mehić, Ilhana Alajbegović, Adrijana Bilalović, Evelina Topalović i Zlatan Spahić.

U diskusiji niko nije učestvovao pa je Vijeće jednoglasno sa 26 glasova ZA usvojilo Rješenje o imenovanju Komisije za provođenje javnog nadmetanja – licitacije pri prodaji poslovnih prostora u vlasništvu Općine Kakanj u sastavu: Adi Kubat – predsjednik, Velida Murtić – zamjenica predsjednika i članovi: Slaven Katičić, Almir Mehić, Ilhana Alajbegović, Adrijana Bilalović, Evelina Topalović i Zlatan Spahić.

3. Prijedlog odluke o utvrđivanju kriterija, postupka, načina davanja i izmjene naziva ulica, trgova, parkova, mostova, institucija, ustanova i naseljenih mjesta na području općine Kakanj

Predlagač: općinski načelnik

Obrađivač: Služba za opću upravu, radne i zajedničke poslove, lokalnu samoupravu i mjesne zajednice

Izjestilac: Bahrudin Arnaut, pomoćnik općinskog načelnika

U diskusiji je učestvovala Marcela Ravlija.

Marcela Ravlija: je predložila da se u Prijedlogu odluke među kriterije za izmjenu ili dodjelu novog naziva uvrste i imena formacija i poginulih boraca NOB-a.

Bahrudin Arnaut: je ispred predlagača prihvatio predloženi amandman vijećnice Ravlija.

Nakon diskusije Vijeće je jednoglasno sa 28 glasova ZA usvojilo Odluku o utvrđivanju kriterija, postupka, načina davanja i izmjene naziva ulica, trgova, parkova, mostova, institucija, ustanova i naseljenih mjesta na području općine Kakanj.

4. Razmatranje Izvještaja o radu JU „Dom zdravlja sa stacionarom“ Kakanj za period 1.1-31.12. 2022. godine

Predlagač: UO JU Dom zdravlja sa stacionarom Kakanj

Obrađivač: UO JU Dom zdravlja sa stacionarom Kakanj

Izjavitelj: Mirsad Tursum, direktor JU i Fahrudin Buza, predsjednik UO JU

U diskusiji su učestvovali: Dževdet Huskić i Marcela Ravlija.

Dževdet Huskić: je rekao da su impresivne brojke o broju pregleda i konsultantskih usluga obavljenih u Domu zdravlja i djeluje da je u pitanju neka bolnica, a ne Dom zdravlja. Istakao je da bi volio da se na neki način mjeri zadovoljstvo korisnika usluga kako bi se više govorilo o kvalitetu, a ne kvantitetu usluga. S tim u vezi se osvrnuo na specijalističke preglede za koje se dugo čeka, a potom se pregled obavi u vrlo kratkom vremenu od oko 5 minuta, a uz to se za isti plaća participacija od 20 KM. U vezi dijela o proširenju prostorija laboratorije je kazao da predlaže da se planira razdvajanje WC-a za djecu i odrasle i da se pokuša uvesti malo reda u sam sistem pružanja laboratorijskih usluga. Na kraju je pohvalio rad i zalaganje svih zaposlenih u Domu zdravlja, s tim da je naglasio neophodnost organizacijskih korekcija u određenim segmentima.

Marcela Ravlija: je pitala kad će se krenuti sa implementacijom projekta prevencije oralnog zdravlja djece predškolskog uzrasta za što su iz općinskog Budžeta izdvojena sredstva od 3 hiljade KM.

Mirsad Tursum (odgovor): se zahvalio na čestitkama, sugestijama i preporukama i činjenici da ljudi prepoznaju napore koje radnici JU ulažu da bi ona funkcionisala na zadovoljavajući način. U vezi pitanja o mjerenju zadovoljstva građana je rekao da se na društvenim režama svaki propust u radu komentariše, ali na sreću nema velikih prigovora niti kardinalnih grešaka počinjenih od strane osoblja. Uz to je rekao da se korisnicima povremno daju anketni upitnici iz kojih se može vidjeti sa čime korisnici usluga nisu zadovoljni. Također, postoji formirana komisija, koja je obavezna po zakonu, koja prati i obrađuje sve pristigle prigovore i žalbe, te postoje i ormarići za pismeno ulaganje prigovora i svih drugih primjedbi. Rekao je da je svjestan da nije sve idealno, ali da je uprkos svemu Dom zdravlja Kakanj ocijenjen kao najbolji Dom zdravlja u Federaciji BiH, prema istraživanju nezavisne međunarodne agencije. U vezi plaćanja participacije za pružene specijalističke usluge je rekao da Dom zdravlja nije dužan da većinu istih obezbjedi (ortoped, urolog i dr.), ali da se to čini kako bi se olakšalo pacijentima da obave preglede, jer bi u suprotnom morali ići van Kaknja na preglede i time sebi stvarati znatno veće troškove od iznosa koji plate za participaciju. Dolazak doktora specijalista u Kakanj se mora platiti, a Dom zdravlja nema sredstva, niti je u obavezi, da te troškove podmiruje, tako da je neophodno da pacijenti plaćaju participaciju, a što je opet znatno manje u odnosu na cijenu specijalističkih pregleda u privatnim zdravstvenim ustanovama. U vezi diskusije oko rada laboratorije je rekao da je njegovim dolaskom na mjesto direktora oformljen još jedan punkt (šalter) za uzimanje laboratorijskih uzoraka s ciljem smanjenja gužve, a pored toga laboranti idu i na kućne adrese za pacijente koji nisu u mogućnosti doći u laboratoriju. Iz Izvještaja je vidljivo da je u predmetnom periodu obavljeno preko 330 hiljada laboratorijskih usluga što podjeljeno sa brojem stanovnika proizlazi da je svaki stanovnik Kaknja u toku godine obavio 10 laboratorijskih usluga. Naglasio je problem sa dopisivanjem stavki na uputnici za laboratoriju, što pacijenti sami čine bez da je ordinirajući doktor to i tražio. Još veći problem je sa nalazima koje niko ne preuzima, što sve utiče da se stvaraju gužve veće od realnih, a uz sve navedeno takvo postupanje pacijenata uzrokuje velike materijalne troškove za Dom zdravlja u vidu troškova materijala i angažmana osoblja. Nada se da će stanje biti bolje kada laboratorija bude informatički uvezana za ambulanta jer pacijenti neće preuzimati najeve fizički, a što bi trebalo vrlo brzo da zaživi. Po pitanju nedostatka prostora je rekao da nije problem samo u nedostatku prostora za laboratoriju, nego je isti slučaj i sa svim drugim službama, ali je to donekle razumljivo ako se zna da je Dom zdravlja počeo sa radom 1974. godine i da se od tada broj usluga samo povećavao, a da je prostor za rad ostao isti. U vezi diskusije oko prevencije oralnog zdravlja djece je rekao da se kontinuirano radi na tom polju, da su cijeli školski razredi dolazili na preglede kod stomatologa, te su oni odlazili na teren i obavljali te aktivnosti. Još je napomenuo da je Dom zdravlja prošao kroz vrlo teško razdoblje borbe sa corona virusom gdje su troškovi značajno bili uvećani, ali se uprkos tome pozitivno poslovalo, pri čemu je svim radnicima isplaćen iznos pomoći po odluci Vlade FBiH i to iz vlastitih prihoda. Pojasnio je da naplaćene participacije idu ZZO i da Dom zdravlja sa tim sredstvima nema ništa, niti može bilo koga osloboditi

plaćanja participacije obzirom da je to Zakonom propisano, a od svih sredstava naplaćenih po osnovu participacije i kupljenih zdravstvenih markica, ZZO je uplatio Domu zdravlja samo 9 hiljada KM.

Marcela Ravlija (replika): je pojasnila da se njeno pitanje odnosilo na sredstva izdvojena Budžetom za prevenciju oralnog zdravlja predškolske (vrtičke) djece, a po inicijativi vijećnice Kulović iz 2021. godine.

Mirsad Tursum (odgovor): je kazao da nije siguran o kojoj grupi djece se radilo, ali je siguran da je među velikim brojem djece koja su obavila preventivni stomatološki pregled bilo i djece iz vrtića. Još je iskazao spremnost da se organizuje stomatološki pregled za djecu iz svih kakanjskih vrtića.

Nakon diskusije Vijeće je jednoglasno sa 27 glasova ZA usvojilo Zaključak o prihvatanju Izvještaja o radu JU „Dom zdravlja sa stacionarom“ Kakanj za period 1.1-31.12. 2022. godine (vijećnik Tursum bio je izuzet od glasanja).

5. Razmatranje Plana rada i razvoja JU „Dom zdravlja sa stacionarom“ Kakanj za 2023.godinu

Predlagač: UO JU Dom zdravlja sa stacionarom Kakanj

Obrađivač: UO JU Dom zdravlja sa stacionarom Kakanj

Izviestilac: Mirsad Tursum, direktor JU i Fahrudin Buza, predsjednik UO JU

U diskusiji je učestvovala Marcela Ravlija.

Marcela Ravlija: je kazala da je iz materijala evidentno da u Domu zdravlja nedostaje doktora specijalista. Istakla je kao problem činjenicu da od 2020. godine djeca koja kreću u školu ne potpadaju pod liječenje pedijatra, nego se liječe u pripadajućim ambulantom porodичne medicine. S toga je pitala da li postoji mogućnost angažmana još jednog pedijatra kako bi se djeca koja su prebačena na liječenje u porodичne ambulante vratila na liječenje u dječiji dispanzer. Još se osvrnula na obavljena 173 mamografska pregleda i 37 oboljelih od karcinoma dojke, te pitala da li se može starosna granica od 50 godina spustiti niže, kako bi i osobe mlađe od te dobi mogle obaviti mamografski pregled, obzirom da je činjenica da sve veći broj mlađih osoba obolijeva od te bolesti.

Mirsad Tursum (odgovor): je naglasio kako je opće stanje u državi da nedostaje medicinskog kadra, a pogotovo doktora specijalista. Nije izuzetak u tom smislu ni Dom zdravlja Kakanj, te smatra da je stanovništvo Kakanja u velikoj mjeri doprinijelo tom stanju, jer se nema sluha za domaće kadrove što se osvjedočio na ličnom primjeru. Kada je u pitanju angažman doktora van Kakanja oni se tu zadrže dok im se ukaže prilika da se zaposle u nekom od većih centara. Napomenuo je ranije iznesnu ideju da se započne gradnja objekta HMP-a i na tom objektu gradnja nekoliko stanova koji bi se po povoljnim uslovima dali na korištenje ili prodali domaćem medicinskom kadru kako bi se zadržali u Kakanju, ali do danas ta ideja nije zaživjela. Što se tiče konkretnog pitanja oko angažmana dodatnog pedijatra rekao je da je konkurs za prijem istog stalno otvoren, ali se niko ne prijavljuje. U vezi diskusije oko mamografskog pregleda je rekao da se isti radi po uočenim indikacijama, a nakon obavljenog UZV pregleda. Pojasnio je da se starosna granica od 50 godina odnosi samo na prijavljene za pregled putem programa kojeg sufinansira Općina i da to nije uobičajeno pravilo kad se radi o tom pregledu. Rekao je da sve veći broj firmi, prilikom obavljanja redovnih sistematskih pregleda radnika, ugovaraju mamografski pregled za svoje radnice.

Nakon diskusije Vijeće je jednoglasno sa 27 glasova ZA usvojilo Zaključak o prihvatanju Plana rada i razvoja JU „Dom zdravlja sa stacionarom“ Kakanj za 2023. godinu (vijećnik Tursum bio je izuzet od glasanja).

6. Razmatranje Informacije o zdravstvenom stanju stanovništva općine Kakanj i informacije o epidemijama u 2022. godini

Predlagač: UO JU Dom zdravlja sa stacionarom Kakanj

Obrađivač: UO JU Dom zdravlja sa stacionarom Kakanj

Izviestilac: Ibrahim Aličković, šef HES-a

U diskusiji je učestvovala Marcela Ravlija.

Marcela Ravlija: je pitala da li postoji zakonska odredba o obaveznoj imunizaciji kako bi se roditelji natjerali da obave vakcinaciju djece. Još je pitala mogu li se provesti odgovarajuće mjere od strane Općine (npr. da se onemoguću upis djece u vrtiće i škole one djece koja nisu prošla kompletan proces imunizacije) kako bi se popravio procenat imuniziranog stanovništva. Naglasila je da bi voljela da se Općina Kakanj ozbiljnije pozabavi problemom velikog broja oboljelih od teških bolesti, a što je u velikoj mjeri uzrokovano zagađenošću vode, zraka i tla i da se opredjeli za neku strategiju kroz koju bi se počelo ulagati u zdravlje stanovništva i čisti okoliš.

Općinski načelnik: je rekao da su neke stvari u Informaciji zabrinjavajuće, dok su neke nešto bolje u odnosu na prethodnu godinu. Podsjetio je da postoji Strategija razvoja i da možda nije obuhvatila sve detalje, ali se ona u svakom slučaju treba detaljnije razrađivati i proširivati kroz akcione planove. Naglasio je nužnost ulaganja u specijalizacije doktora u narednom periodu, kao i neophodan dodatni angažman u rješavanju kompleksne situacije u zdravstvu u dijelu koji se tiče lokalne zajednice. Također, rekao je da je potrebno intenzivirati aktivnosti oko iznalaska lokacije za izgradnju objekta HMP u narednom periodu i naglasio nužnost veće angažiranost Vijeća i općinskog načelnika u cilju popravljivanja stanja u zdravstvu. Istakao je dio Informacije koji govori o vrlo malo vodovoda na području općine koji imaju higijenski ispravnu vodu za piće, a godinama se koristi, što u konačnici izaziva ogromne zdravstvene probleme.

Ibrahim Aličković (odgovor): je pojasnio da sprovođenje vakcinacije ima naredbodavni karakter sada, kao i u ranijem sistemu, ali je razlika što se trenutno ne ide u realizaciju kaznenih odredbi naredbe za one koji istu ne poštuju. To je dijelom uzrokovano nedostatkom inspektora, što je opet različito od jednog do drugog kantona i lošim sistemom provođenja naredbe. Rekao je da ga žalosti što se posebno u Kaknju izbjegava vakcinacija i da je tako nizak nivo svijesti o nužnosti iste. Zbog toga je pozvao sve, da u svom okruženju ulože napore, da se počne pozitivno razmišljati o imunizaciji za koju nauka kaže da je najbolji vid prevencije.

Mirsad Tursum: je naglasio da je problem izbjegavanja vakcinacije ozbiljna tema, jer postoji mogućnost da se vrate i davno iskorijenjene bolesti i da izazovu masovna obolijevanja i umiranja. Rekao je da nije za sistem kažnjavanja, nego je više za to da se svi aktivno uključe u isticanje značaja imunizacije i podizanja svijesti o značaju iste, pa da se u tom smislu u promociju uključe firme, vjerske zajednice, škole i sve druge organizacije koje imaju moć uticaja na ljude. Uz to je istakao veliki problem društvenih mreža koje svojim objavama (antivakcerskim) u vrlo kratkom vremenu anuliraju ono što se kroz dugi period napravi podizanjem svijesti građana kroz promociju značaja imunizacije. Zahvalio se svim diskutantima na aktivnom učešću u diskusiji po tačkama koje su bile vezane za Dom zdravlja, a posebno općinskom načelniku na podršci u dosadašnjem i budućem radu. Apelovao je na vijećnike da se ozbiljno shvati problem sa nedostatkom prostora za potrebe laboratorije, HMP-a i ambulante „Stara jama“ i predložio da se u narednoj budžetskoj godini pokuša riješiti berem jedan od navedenih gorućih problema izdvajanjem sredstava za tu namjenu.

Predsjedavajući je predložio da Vijeće usvoji zaključak na temelju završnog izlaganja direktora Doma zdravlja, kako slijedi: Općinsko vijeće krajnje ozbiljno sagledava problem sa nedostatkom adekvatnog prostora za potrebe Službe Hitne medicinske pomoći, te Službu laboratorije i Ambulante porodične medicine „Stara jama“. Daje se podrška menadžmentu JU „Dom zdravlja sa stacionarom“ Kakanj u aktivnostima oko iznalaženja adekvatnog rješenja za unapređenje rada u svim organizacionim jedinicama Javne ustanove, a posebno Službe HMP, Službe laboratorije i Ambulante porodične medicine „Stara jama“. Zaključkom se izražava spremnost i nastojanje Općinskog vijeća i Općinskog načelnika da se u narednoj budžetskoj godini uključe u rješavanje najmanje jednog problema konstatovanog u Zaključku.

Nakon diskusije Vijeće je jednoglasno sa 24 glasa ZA usvojilo Zaključak o primanju k znanju Informacije o zdravstvenom stanju stanovništva općine Kakanj i informacije o epidemijama u 2022. godini, te je uz to jednoglasno sa 22 glasa ZA usvojen sljedeći Zaključak: Općinsko vijeće krajnje ozbiljno sagledava problem sa nedostatkom adekvatnog prostora za potrebe Službe Hitne medicinske pomoći, te Službu laboratorije i Ambulante porodične medicine „Stara jama“. Daje se podrška menadžmentu JU „Dom zdravlja sa stacionarom“ Kakanj u aktivnostima oko iznalaženja adekvatnog rješenja za unapređenje rada u svim organizacionim jedinicama Javne ustanove, a posebno Službe HMP, Službe laboratorije i Ambulante porodične medicine „Stara jama“. Zaključkom se izražava spremnost i nastojanje Općinskog

vijeća i Općinskog načelnika da se u narednoj budžetskoj godini uključe u rješavanje najmanje jednog problema konstatovanog u Zaključku (vijećnik Tursum je bio je izuzet od glasanja po oba zaključka).

7. Razmatranje Izvještaja o radu JU Centar za socijalni rad sa Finansijskim izvještajem za 2022. godinu

Predlagač: UO JU Centar za socijalni rad Kakanj

Obrađivač: UO JU Centar za socijalni rad Kakanj

Izjestilac: Fakir Ajdinović, direktor JU i Samir Husika, predsjednik UO JU

U diskusiji nije niko učestvovao i Vijeće je jednoglasno sa 22 glasa ZA usvojilo Zaključak o prihvatanju Izvještaja o radu JU Centar za socijalni rad sa Finansijskim izvještajem za 2022. godinu.

8. Razmatranje Izvještaja o poslovanju JP „Grijanje“ d.o.o. Kakanj sa Finansijskim izvještajem i Izvještajem o reviziji finansijskih izvještaja za 2022. godinu

Predlagač: Skupština JP „Grijanje“ d.o.o. Kakanj

Obrađivač: Skupština JP „Grijanje“ d.o.o. Kakanj

Izjestilac: Muamer Čelebić, direktor JP i Mirnes Merdić, predsjednik Skupštine JP

U diskusiji je učestvovala Marcela Ravlija.

Marcela Ravlija: se osvrnula na konstataciju u Izvještaju gdje stoji da je veoma nepovoljan odnos individualnih stambenih objekata u odnosu na stambene zgrade jedan od problema za poslovanje Grijanja, jer individualni stambeni objekti zahtjevaju tri puta veću energetske intenzivnost. U tom je kontekstu podsjetila na, u ranijem periodu ulagani amandman NS, gdje se predlagalo da se usvoji petogodišnji plan utopljanja objekata (u vidu sufinansiranja ugradnje termo-fasada) čime bi se smanjila potrošnja energije. Mišljenja je da bi se trebalo u budućem periodu ići u tom smjeru, što bi dovelo do smanjenja troškova poslovanja Grijanja, a istovremeno bi se uticalo i na smanjenje aerozagađenja.

Nakon diskusije Vijeće je usvojilo Zaključak o prihvatanju Izvještaja o poslovanju JP „Grijanje“ d.o.o. Kakanj sa Finansijskim izvještajem i Izvještajem o reviziji finansijskih izvještaja za 2022. godinu, sa 20 glasova ZA, bez glasova PROTIV i 5 glasova UZDRŽAN.

Predsjedavajući je zaključio rad 30. redovne sjednice Općinskog vijeća u 12:00 h, uz čestitku u svoje ime i ime Općinskog vijeća za nastupajući Kurban bajram.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić